

## Uvjeti postignuća sreće na Zemlji

Sve je stvoreno u paru: nebo i zemlja, vatra i voda, dan i noć, svjetlo i tama. Onog momenta kada naša duša i naše tijelo dođu na ovaj svijet, mi smo čisti od svakog grijeha. Međutim, naša prvobitna čistota nije garancija da ćemo se voditi onim lijepim i iskrenim i da nećemo grijешiti. Ali, ono što nam je garancija za zdrav i otvoren um, jeste spoznaja samog sebe i dovođenje u ravnotežu svake dvije krajnosti od kojih je sastavljena ljudska duša. Baš kao što je atom sastavljen od protona i elektrona koji su u ravnoteži, tako je i duša izbalansirana između dobrih i loših osobina. Razlika između atoma i duše jeste ta što na atome mora djelovati neka viša sila, a mi sami biramo koje će osobine prevagnuti i hoćemo li zadržati tu našu ljudskost sa kojom se rađamo.

Početak shvatanja samog sebe počinje postavljanjem velikih pitanja na koja ćemo teško dobiti odgovor. Vjerovatno ćemo i provesti život u traganju za istinom, ali iskustvo dobiveno na taj način je jak putokaz za svako sljedeće iznenađenje koje nam život priredi. Vjerovatno toga nismo ni svjesni, ali Istina je tu, svuda oko nas su dokazi. Istina je u samoj biti čovjeka, u veličanstvenom stvaranju jedinog Gospodara. Pa čovječe, zašto si ti došao na ovaj svijet?! Je li da nijemo posmatraš i čekaš da dođu neka bolja vremena ili da aktivno djeluješ znajući da ćeš uspjeti sve dok je Gospodar tvoj uz tebe? Zašto baš ti ne bi bio nasljednik našeg velikana Huseina ef. Đoze, reformatora i mislioca? To može svaki čovjek koji je spreman one prolazne i površinske stvari zamijeniti sa onim značajnim i vječnim. Zar da svoja srca prljamo osuđivanjem i predrasudama kada možemo živjeti mirno i srce puniti ljepotom koja nas okružuje? Svaka stvar ima svoju posebnu ljepotu, a od našeg pogleda na svijet uveliko zavisi i sami čin napretka, razvoja civilizacije i čuvanja onoga što već imamo – tradicije. „Ikre bismi rabbike“ – „Uči, čitaj, u ime Gospodara tvoga“. Znanjem otvaramo oči i svaku moguću kapiju koja nam se čini preteška i nepremostiva. Ljepota je u razlikama, u pronalasku našeg idealnog para, različitog od nas koji će napraviti idealnu, gotovo savršenu harmoniju koja nas nadopunjava i oslobađa. Čovjek je tvorac svoje sreće, on ne zavisi od društva. Ali, znanjem, ljubavlju, optimizmom i otvorenim dijalogom itekako utiče na razvoj društva i na opću sliku stanja u kojem se ono nalazi.

Promjene počinju od nas. Ma koliko se one činile nebitne i male, ne smijemo prestati težiti ispunjenju naših ciljeva. Nakon spoznaje sebe, kroz spoznaju Boga, naš cilj i naša sreća treba da bude motivisanje drugih i apsolutna podrška i pomoć drugima. Razumijevanje i ljudskost su naše glavno oružje, pored ljubavi i znanja. Nije bitno kako to radiš, samo, šta god da radiš, čini to svim srcem, i, ako uspiješ nadahnuti i uputiti barem jednog čovjeka u svojoj okolini, uspio si u svom naumu. Promjene počinju sada, ovog momenta, pa idi, kreni sa njima i podari nekom prolazniku osmijeh, uputi mu lijepu riječ i pozitivno iznenadi nekoga.

Aida Uzunović  
STŠ „Hasib Hadžović“ - Goražde